

TEKS UCAPAN

Yang Berhormat
Pehin Udana Khatib Dato Paduka Seri Setia
Ustaz Haji Awang Badaruddin bin Pengarah
Dato Paduka Haji Awang Othman
Menteri Hal Ehwal Dalam Negeri

SELAKU TETAMU KEHORMAT
BAGI UPACARA PERBARISAN SEMPENA
SAMBUTAN ULANG TAHUN
JABATAN BOMBA DAN PENYELAMAT
KALI KE 55

Pada Hari Rabu,
10 Rejab 1436 bersamaan
29 April 2015

Jam 8.15 pagi

Di Padang Kawad,
Ibu Pejabat Bomba
Negara Brunei Darussalam.

بِسْمِ اللَّهِ الرَّحْمَنِ الرَّحِيمِ
الحمد لله رب العالمين، وبه نستعين على أمور الدنيا والدين،
والصلاة والسلام على أشرف الأنبياء والمرسلين سيدنا محمد وعلى آله وصحبه
أجمعين
السلام عليكم ورحمة الله وبركاته

Alhamdulillah saya mengucapkan syukur di atas limpah izinNya jua untuk kesekian kali saya berkesempatan hadir dalam acara ini.

Terima kasih yang setinggi-tingginya kepada Jabatan Bomba dan Penyelamat. Semoga ingatan baik menyertakan saya dalam acara tahunan ini akan juga menjadi ristaan baik di kemudian hari.

Jabatan Bomba dan Penyelamat mencapai usia ke 55 tahun. Perbarisan hari ini adalah sempena usianya itu.

Maka dalam kesempatan ini saya ingin merakamkan ucapan selamat ulangtahun ke-55, dengan iringan do'a semoga awda sekalin sentiasa dalam perlindungan Allah *Subhanahu Wa Ta'ala*, terhindar daripada kesan segala bahaya tugas yang dijalankan, sentiasa pula dalam sihat dan sejahtera, bersama rakan-rakan setugas, dan lebih-lebih lagi bersama ahli keluarga dan sanak saudara.

Dalam suasana majlis dan acara sambutan ini saya percaya setiap jajaran dalam perkhidmatan Bomba dan Penyelamat tentu merasa syukur dan bangga.

Awda bersyukur kerana dapat memberikan khidmat bakti kepada kerajaan dan orang ramai dalam bidang keselamatan awam.

Dan awda juga dapat berbangga dengan khidmat masing-masing. Pasukan awda ini adalah pasukan yang mendapat kepercayaan orang ramai. Jasanya sangat ketara, dapat dilihat dan dirasakan. Tidak sahaja sebagai pemadam kebakaran bahkan adalah penyelamat jiwa dan harta benda.

Oleh kerana itulah dalam waktu-waktu kecemasan orang ramai segera teringatkan bomba dan penyelamat. Mereka tidak sahaja menaruh kepercayaan kepada kebolehan dan kecekapan anggota-anggota bomba dan penyelamat bahkan mereka menghargakan khidmat bakti pasukan pertahanan awam ini. Kerana itulah semasa pasukan bomba dan penyelamat beroperasi merespon panggilan kecemasan, orang ramai tidak teragak-agak bekerjasama memberikan bantuan dan sokongan tenaga kepada anggota-anggota yang bertugas.

Sementara itu pihak kerajaan pula dari semasa kesemasa memberikan peruntukan belanjawan yang dalam jumlah yang munasabah kepada Jabatan Bomba dan Penyelamat bagi melengkapkan keperluan-keperluannya, sambil memastikan

keselamatan dan kesejahteraan anggota-anggotanya seperti memberikan perlindungan skim takaful. Dan sejak tahun lepas Kementerian telah bersetuju menaikkan kadar elaun menyelam selaras dengan kadar yang diterima oleh anggota Angkatan Bersenjata.

Dalam waktu yang sama, awda tentu berharap Kementerian akan meneliti pula kesesuaian pemberian elaun khas insentif bagi kepakaran hazmat (bahan berbahaya) dan squad khas.

Namun sebelum hal itu menjadi kenyataan, saya berharap Jabatan Bomba dan Penyelamat akan terus meningkatkan mutu perkhidmatannya.

Misalnya mengenai 'respon time' sepuluh minit kebawah bagi sesuatu panggilan kecemasan yang ditetapkan dalam KPI. Jabatan sendiri mendapati respon time berkenaan telah mencapai 74% namun ianya dapat ditingkatkan lagi ke 85% dalam jangka masa pendek dan 90% dalam jangka masa sederhana berbanding dengan respon time dikebanyakan negara terutama negara-negara maju.

Dari segi latihan dan peningkatan kapasiti anggota-anggota dan pegawai-pegawai pula, latihan-latihan yang diikuti samada menerusi program latihan khusus yang diadakan dalam negeri mahupun menyertai rakan-rakan mereka diluar negara, hendaklah dimanfaatkan semaksimal mungkin.

Dengan cara itu awda akan dapat menjalankan khidmat dengan penuh yakin dan berani secara profesional.

Seperti halnya pada musim kemarau atau cuaca kering sekarang ini, sebahagian daripada awda menjalankan operasi memadam dan mengawal kebakaran hutan dan tanah gambut di beberapa kawasan yang terjejas. Statistik mencatatkan ada sebanyak 269 panggilan diterima dan telah direspon dalam tiga bulan pertama tahun ini.

Saya merasa bersimpati kepada sekalian yang bertugas dalam operasi yang sedang berjalan pada musim cuaca kering sekarang atas jerih payah yang ditempuh, khasnya dalam menangani kebakaran tanah gambut di beberapa kawasan di Seria dan Belait sejak 23 Mac lepas hingga sekarang sudah lebih dari sebulan.

Orang ramai pula hendaknya turut memahami dengan fahaman dan sangkaan baik bahawa tugas memadam api kebakaran tanah gambut tidaklah sama seperti memadam api kebakaran hutan biasa yang juga rumit tetapi sangat berlainan daripada hutan bertanah gambut yang bara apinya di bawah permukaan tanah.

Bagaimanapun orang ramai tentu mengharapkan anggota-anggota bomba dan penyelamat akan berhasil memadamkan kebakaran tanah gambut yang seolah-olah berpanjangan itu dan mengawalinya daripada merebak ke kawasan-kawasan berdekatan.

Dalam kesempatan ini saya ingin menyatakan penghargaan dan terima kasih kepada banyak pihak yang berkepentingan yang telah turut membantu operasi, termasuk anggota-anggota daripada Angkatan Bersenjata Diraja Brunei, Pasukan Polis Diraja Brunei, Jabatan Kerja Raya Kementerian Pembangunan dan juga daripada pihak Syarikat Brunei – Shell Petroleum serta British Garrison.

Satu perkara yang mustahak diketahui umum ialah mengenai risiko yang diterima oleh anggota-anggota Pasukan Bomba dan Penyelamat dalam tugas mereka memadam kebakaran.

Satu kajian di Australia oleh University Monash menunjukkan bahawa dari kajian selama tiga tahun kebelakangan (2011-2014) mendapati anggota-anggota bomba adalah 45% lebih tinggi dibandingkan dengan angka penderita kanser di kalangan masyarakat umum. Ini ialah berpunca daripada kekerapan mereka terdedah kepada bahan berbahaya.

Oleh itu Jabatan Bomba dan Penyelamat hendaklah sentiasa mengambil kira kepentingan jangka panjang keselamatan dan kesihatan anggota-anggotanya dengan terus menerus berusaha melengkapkan mereka dengan peralatan keselamatan dan memastikan kelengkapan *fire fighting gear* digunakan menurut tatacara penggunaan mengikut *best practices*.

Demikianlah adanya. Buat mengakhiri ucapan ini saya sekali lagi mengucapkan terima kasih kepada Yang Mulia Pengarah Bomba

dan Penyelamat sambil mendoakan semua lapisan pegawai dan anggota akan sentiasa dalam perlindungan Allah *Subhanahu Wa Ta'ala* sentiasa bersikap positif, mengamalkan cara hidup sihat, menikmati sepenuhnya saat-saat bahagia, aman dan ceria bersama keluarga.

وبالله التوفيق والهداية والسلام عليكم ورحمة الله وبركاته

**- Pehin Udana Khatib Dato Paduka Seri Setia
Ustaz Haji Awang Badaruddin bin Pengarah
Dato Paduka Haji Awang Othman.
(Menteri Hal Ehwal Dalam Negeri).**

Pejabat Menteri,
Kementerian Hal Ehwal Dalam Negeri,
Bandar Seri Begawan.
Selasa, 9 Rejab 1436/ 28 April 2015